



Protocol

dalla seduta dil cussegl da vischnaunca,
venderdis, ils 29 da schaner 2016, allas 20¹⁵- 22⁴⁰
en casa communal

Presidi: Livio Zanetti

Actuar: Ervin Maissen

Presents:

- | | | |
|----------------------------|---|--|
| a) Cussegl | Christoph Berger
Adrian Bigliel
Silvio Candinas
Adrian Deflorin
Edgar Durschei
Rita Huonder-Tenner | Wendelin Jacomet
Jordana Lozza-Desax
Armin Manetsch
Adrian Pally
Alfred Spescha
Livio Zanetti |
| b) Suprastonza
communal | Francestg Cajacob
Cecilia Maissen-Desax | Roger Tuor
Iso Mazzetta |
| c) Perstgisas | Armin Berther
Madlen Deflorin-Spescha | Flavio Murer
Rico Tuor |
| d) Hosps | 6 | |

“Ils 16 da december 2015 ein vischinas e vischins vegni informai davart l’avertura d’in center da fugitivs egl anteriur Hostel Cucagna. Ils maletgs da fugitivs che nus tuts havein viu ella televisun, ein en in gienà entrai en nossa veta quotidiana. La realitad cun las immensas massas da fugitivs ei era setschentada a Mustér.

Mustér piarda aunc inagada in hotel e cunquei piarda il turissem ina pusseivladad da pernottaziun cun prezis favoreivels. D’eminenta impurtonza ei cheu in bien contact cun il menader dil center da fugitivs ed in bien plan da lavur per ils requirents d’asil. Quei era ord motivs etics. In carstgaun ch’ei buca occupaus vegn ad haver liunguriala, vegn ad empruar da s’occupar cun activitads e quellas ein buca adina las meglieras.

La nova situaziun sa era esser ina schanza per nossa vischnaunca. Jeu audel aunc adina ils lamentems giustificai sur da trutgs, vias, sendas e mirs che stuessen vegnir renovai ni da pastiras che stuessen vegnir cultivadas. Sco era autras lavurs, che nossa gruppa dil menaschi tecnic ha semplamein buca peda da far. Ussa fuss la schanza cheu da prender a mauns tut quellas lavurs. Jeu sun era dil meini che quei ei giustificau. Ils fugitivs duessen separticipar a nossas lavurs communalas ed alla veta en vischnaunca. Sche nus mussein e declarein ad els nossas reglas e disas vegnan els era plitost ad acceptar e respectar nossa moda da viver e nus contonschin ina buna convivenza. Mo aschia sai jeu s’imaginar ch’il menaschi dil center egl anteriur Hostel Cucagna funcziuna senza gronds incaps.

In auter tema che ha scaldau ad in u l’auter il tgau ei stau la munconza da neiv. SDT e las pendicularas ein sespruai cun programs alternativs d’activar ils hosps da tuttina vegnir tier nus a far vacanzas da Nadal e forsa era da fugir dalla nebla giu ella bassa. Per ils hosps han las Pendicularas da Mustér, cun diversas autras organisaziuns, purschiu in program alternativ. Ellas han organisau la pusseivladad da dar giugs, uras da zambergiar, suentermiezdis da praulas e perfin il teater da casparets ei vegnius si Caischavedra. El kiosk dalla uniun da viandar e scursalar a Mumpé Medel han nos hosps astgau guder in bien fondue. Il Center da sport e cultura ha prolunghiu ils temps d’avertura dalla piazza da glatsch e ha reaviert la piazza da minigolf. Quei ein bein mo in pèr exempels. Cun quellas acziuns han els tuttina offeriu a nos hosps in bien program alternativ. Da mia vart in grond engraziament a tut ils involvai per lur lavur, per segidar a porscher a nos hosps in bien ed attractiv temps tier nus.

Engraziar less jeu era allas scolaras, als scolars sco era a lur scolasts per il cantar dils retgs. In usit che vegn promovius activamein ed aschia mantenius.

Gie, igl onn niev ha entschiet cun ina u l’autra sfida. Temas che vegnan segiramein ad occupar nus vinavon ein la collaboraziun el sector da turissem, sco gia menziunau l’avertura dil center d’asilants, il spustament da cuosts dil cantun enviers las vischnauncas, las finanzas, il rinforz da Mustér sco vischnaunca da habitar, da luvrar ed era sco liug da center, las diversas renovaziuns d’objects ed infrastruttura. Las votaziuns davart la meglieraziun, las elecziuns dallas autoritads communalas per la nova perioda d’uffeci.

Jeu supplicheschel en quei connex da comunicar ad uras tgi che stat buca pli a disposiziun per ina proxima legislatura. (Lescha davart ils dretgs politics, art. 24).

La suprastanza supplicheschel jeu, d’activar la cummissiun preparatoria (art. 25^{bis} dalla lescha davart ils dretgs politics). Da contactar las organisaziuns d’interess sco ils vschinadis, las partidas politics, l’uniun da commerci, l’uniun da dunnas, la gastro ni era autras gruppaziuns che s’engaschan pils fatgs publics. Aschia san quellas proponer avunda candidatas e candidats per ils uffecis. Era nus envidel jeu da contactar a temps personas adattadas per ils posts che vegnan evtl. libers. Quellas activitads ston, ord mia veta, vegnir lantschadas ad uras, sche buca gia egl emprem quartal dil 2016. Naturalmein sperel jeu da puder luvrar vinavon cun vos tuts.

Jeu less aunc piarder entgins plaids sur dil plaid jocher. Tgei ei in summa in jocher? Daco vegn il plaid jocher cumbinaus cun cletg? Els giugs da cartas ei in jocher quella carta che dat als giugadurs bunamein tuttas pusseivladads. Quella che remplazza autras cartas e che possibilitescha da gudignar. Ha Mustér il cletg dad haver in jocher? In jocher per nies futur. Sche jeu mirel en autras vischnauncas, lu ein quellas buca en quella luxuriosa situaziun dad haver in investur cun in enorm engaschi personal. Na, ellas ein sin la tscherca dad investurs per finanziair lur projects ni ch’ei vegn fatg diversas empermischuns. Tgi sa sche quellas vegnan lu era veramein realisadas.

Lein buca emblidar, Mustér ha il cletg dad haver ina persuna cun in fetg grond engaschi persunal ed ina gronda purziun idealissem per nies vitg, per nossa destinaziun turistica. Forsa ei quei nies jocher, lein esser realists, contrahar da maniera gesta sco era plazzar nos interess e giavischs. Lein esser el clar da quei fatg e porscher il sustegn adequat agl investur.

Dapi la davosa seduta dil cussegl da vischnaunca dalla perioda d'uffeci 2013/2016 han ils suandonts vischins e vischinas bandunau il terrester. Cun in bien patratg lein nus seregurdar da:

Mathias Deflorin da Mumpé Medel, naschius ils 12 da schaner 1939, morts ils 13 da december 2015; Maria Flepp-Manetsch da Clavaniev, naschida ils 5 da matg 1935, morta ils 29 da december 2015; Giusep Caminada da Mumpé Medel, naschius ils 11 da december 1924, morts ils 3 da schaner 2016; Pia Maria Durschei da Buretsch, naschida ils 31 da december 1956, morta ils 8 da schaner 2016, ella ei stada fetg engaschada per la scolaziun da tgauns da tschocs ed ha aschia possibilitau e levgiu a persunas tschocas la veta quotidiana; Rosa Giger da Sontget, naschida il 12 da fevrer 1929, morta ils 27 da schaner 2016.

A Cuera ei l'antriura ustiera dil Hotel Lucmagn, Anita Giger-Vincenz morta ils 20 da schaner 2016 ella ei naschida ils 18 d'avrel 1936.

Ils defuncts ruaussien en pasch.

Grond plascher hai jeu da comunicar dapi nossa davosa seduta dil cussegl da vischnaunca quater naschientschas:

Kyara da Costa Gonçalves, naschida il 5 da december 2015, feglia da Vanessa Patricia Faria Da Costa ed Octávio José de Sá Gonçalves; Eva da Silva Fontes, naschida ils 9 da december 2015, feglia dad Elsa Marina Marques da Silva e José Filipe da Costa Fontes; Santiago Lopes Campos, naschius ils 15 da schaner 2016, fegl da Silvia Raquel Caldeira Lopes e Hélder Manuel Rodrigues Campos e Joel Dominic Demont, naschius ils 19 da schaner 2016, fegl da Simona e Simon Demont.

Cordial beinvegni ad els ed als loschs geniturs nossa cordiala gratulaziun.

Cunquei arvel jeu l'emprema seduta digl onn 2016."

La gliesta da tractandas secloma sco suonda:

Tractandas:

1. Protocols 26/1-, 26/2- e 27-2013/2016
2. Ual Val Acletta: Project per rempar e credit da planisaziun (messadi nr. 37-2013/2016)
3. Ura da damondas (conform ad art. 44 dil regulativ da fatschentas)

Cussegl da vischnaunca Disentis/Mustér
Il president: Igl actuar:

Livio Zanetti

Ervin Maissen



1. Protocols 26/1-, 26/2- e 27-2013/2016

Regulativ da fatschentas

Art. 46

¹*Il protocol ha da cuntener las fatschentas, propostas ed ils conclus, sco era igl essenzial dalla discussiun. Tier votaziuns ed elecziuns ei il diember dallas vuschs d'indicar.*

²*Declaraziuns per mauns dil protocol san vegnir dadas mo ella seduta ch'il conclus vegn prius. Ellas ston vegnir formuladas a scret.*

³*Il protocol vegn tarmess als cusseglers ed approbaus ella proxima seduta. Propostas per midadas ston succeder a scret.*

Cusseglieras e cusseglers obtegnan caschun da prender posiziun tiel protocol enteifer tschun dis suenter che quel ei vegnius redigius e tarmess ad els electronicamein. Ils cusseglers han nezegiau quella caschun. En in cass ei l'objecziun vegnida risguardada ed il petent ha confirmau all'administraziun communal che la versiun corrigida seigi correcta.

En in auter cass ha il giavisch buca saviu vegnir risguardaus, perquei che las cefras eran buca vegnidas numnadas a caschun dalla seduta. En quei cass succeda la precisaziun en connex cun l'approbaziun dil protocol.

Protocol 26/1-2013/2016

Neginas objecziuns

Protocol 26/2-2013/2016

Pagina 10

Cusseglia Edgar Durschei

(declaraziun a bucca dalla suprastanza communal e dil petent)

La suprastanza communal ha rispundiu tenor la formulaziun indicada el protocol. Apparentamein ha ei giu dau ina malcapientscha denter l'interpretaziun dalla damonda e la risposta entras la suprastanza communal. Il petent ha giavischau sclariment davart ils mieds finansials dalla cuminonza da maschinas forestalas e buca davart il gudogn. La facultad dalla cuminonza da maschinas per la Cadi secumpona sco suonda:

Contribuziun da fundaziun, vischnaunca da Sumvitg	frs. 13'333.35
Contribuziun da fundaziun, vischnaunca da Trun	frs. 13'333.35
Contribuziun da fundaziun, vischnaunca da Mustér	frs. 13'333.35
Capital agen	frs. 47'593.10
Total capital agen dalla cuminonza da maschinas forestalas dalla Cadi	frs. 87'593.15

Cusseglie Wendelin Jacomet

(declaraziun a bucca dil petent)

El giavischa che la formulaziun dalla risposta dalla suprastanza communal sin pagina 12 concernent il tunnel denter Sedrun e Caschinutta vegni precisada. Quella formulaziun savessi caschunar malcapientschas. La formulaziun dalla precisaziun surlai el alla suprastanza communal.

Suprastanza communal

(precisaziun dalla risposta a cusseglier Wendelin Jacomet succeda posteriuramein suenter l'approbaziun entras il cussegl da vischnaunca)

Il president communal da Mustér e Medel han tematisau independentamein il project cun cusseglier guvernativ Mario Cavigelli. Il cantun ha priu enconuschientscha dil project.

Sebasond sin las discussiuns occurridas ed en coordinaziun cul cau dil departament han las vischnauncas dalla Cadi suttemess ina brev cul giavisch da prolungir la galleria Scopi sco era da sanar il tschancun denter Platta ed il Pass Lucmagn (cunzun las gallerias existentas). Cusseglie naziunal Martin Candinas ei sebasond sin quella brev en direct contact cun la Regenza ed il departament da construcziun bassa. Ins quenta cun cuosts da rodund 40 milliuns francs. El decuors dalla primavera 2016 duein emprems resultats esser sin meisa.

Decisiun

Il protocols nr. 26/1-, 26/2- e 27-2013/2016 vegnan approvai cun risguardar sura adattaziuns.

Cussegl da vischnaunca Disentis/Mustér

Il president:

Igl actuar:

Livio Zanetti

Ervin Maissen



2. Ual Val Acletta: Project per rempar e credit da planisaziun (messadi nr. 37-2013/2016)

Suprastonza communal

En num dalla suprastonza communal ed a basa dil messadi nr. 37-2013/2016 presenta gerau Iso Mazzetta la fatschenta.

Enviers il messadi menziunescha el suandontas cumpletaziuns:

Ils mieds financials che stattan a disposiziun alla vischnaunca per investziuns ein restrenschi. Perquei eis ei necessari da valetar bein nua e co la vischnaunca sa s'engaschar. Leu nua ch'ella sa far quei per possibilitar a privats da far investziuns. Ina fuorma ei la pusseivladad d'enzonar terren en zona da baghegiar. Quei ha la vischnaunca fatg cun enzonar il Crest d'Acletta, la zona da mistregn a Marias/Pignola, las adattaziuns dalla zona speciala Disentiserhof e la midada dalla zona da parcar a Sontga Catrina en ina zona speciala (zona speciala Catrina). La midada dalla zona da parcar en ina zona da habitar ha en mintgacass in'otra valeta ch'ina midada en ina zona da resort. El cass d'ina zona da resort ein las pusseivladads restrenschas.

Il maun public ha l'incarica da segirar il terren da baghegiar ed ils habitadis cun ustonzas enviers ils prighels dalla natira.

Las mesiras previdas sin fundament dil studi da variantas, ord il qual ei seresulta la sligiazion che duei vegnir projectada, possibiliteschan da reducir la surfatscha dalla zona cotschna e dalla zona blava enteifer la quala ils parcadis dallas pendicularas sesanflan gia oz sco era da meglierar la situaziun dalla zona da prighel entochen tier la punt stradala a Funs. Il studi ha denton buca intercuretg en detagl las consequenzas sil tschancun denter Funs e Raveras, nua che ulteriurs baghetgs e territoris da habitar ein pertuccai. Quell'examinaziun sa succeder el rom dil project d'exposiziun per il qual la suprastonza communal tschenta la damonda da credit.

En connex cun las malauras digl onn 2005 en Svizra ha la confederaziun pretendiu ch'ils prighels d'aua e boas vegnien era integrai els plans da prighel. Per la vischnaunca da Mustér ei quei succediu il mars 2013. Las midadas dalla carta da prighel relavantas per la planisaziun locala ston vegnir risguardadas a caschun dalla proxima revisiun totala dalla planisaziun locala.

Il project per l'ustonza ella Val Acletta vegn tractaus cun prioritad. Per saver conceder la lubientscha da baghegiar pil resort eis ei necessari d'enconuscher il project, las consequenzas el cass d'ina realisaziun sin la carta da prighel e las consequenzas directas per ina surbaghegiada a Sontga Catrina.

Aschinavon ch'il project tenor il studi vegn buca realisaus, excluda quei buca la necessitad da sanar igl uor actual sper la staziun da val a Sontga Catrina sco era ulteriurs tschancuns digl ual. Ultra da quei vegn il resort a stuer realisar in schurmetg d'object. Quella sligiazion vegn denton cumbattida davart dalla tgira da monuments concernent il maletg dalla cuntrada. Plinavon muntass il schurmetg d'object in impediment pil menaschi da skis, cunquei ch'il baghetg stuess vegnir alzaus per ca. 1.5 m. Era igl investur favorisescha la varianta cun segirar la Val Acletta e quei buca ord motivs da cuosts, perquei che la sligiazion senza schurmetg d'object vegn per el anzi pli cara.

El messadi ha la suprastanza communal vuliu orientar davart las investiziuns ch'il proprietari dallas pendicularas preveda el futur e davart evtl. obligaziuns davart dalla

vischnaunca. La damonda suenter quellas cefras fuss vegnida tschentada cun segirtad. Quellas cefras ein informativas. Concernent las investiziuns previstas e participaziuns dil maun public e dalla vischnaunca d'ina vart e dallas pendicularas da l'atra vart eis ei necessari da menar contractivas.

Discussiun davart la debatta d'entrada

Cussegl da vischnaunca

Enviers il messadi ha il cussegl da vischnaunca retschert entginas informaziuns supplementaras. Pertgei ei quella summa buca vegnida risguardada en quella dimensiun el program d'investiziun? Quell'investiziun supplementara ha consequenzas per autras investiziuns che stattan sin rucca. Ha la vischnaunca in summa la pusseivladad da recaltgar tons credits per tuttas investiziuns previstas? Tgei succeda cul resort sch'il pievel decida da buca conceder il credit da baghegiar? Avon che saver decider davart in summa conceder in credit da projectaziun, duei la suprastanza communal suttametter ina gliesta davart la prioritaziun dallas investiziuns ed ina posiziun co ils instituts bancars giudichesch la bonitad dalla vischnaunca. En quei connex setschenta la damonda davart la differenziaziun denter in credit ed in emprest.

Suprastanza communal

Cheu plaidan ins d'in credit da rama che vegn concedius digl institut. El rom dil credit da rama sa la vischnaunca clamar giu tenor basegns emprests entochen che la limita dil credit ei contonschida.

En connex cul plan da finanzas ed il program d'investiziun ei ina prioritaziun dallas investiziuns succedida. La suprastanza communal preveda da suttametter il zercladur 2016 al cussegl da vischnaunca il plan da finanzas cun il program d'investiziun ed il program d'activitad. El rom da quei program disponan las bancas d'in document a basa dil qual ellas san prender posiziun.

Actualmein eis ei impurtont d'accelerar las lavurs da projectaziun per la Val Acletta per saver disponer ad uras dalla basa per conceder la lubientscha da baghegiar dil Resort Catrina. Silsuenter san ins sclarir cun las bancas la situaziun finanziaria concernent la crediteivladad dalla vischnaunca. Ord vesta dalla bancas ei la situaziun dalla vischnaunca da Mustér buca aschi schliata.

Cussegl da vischnaunca

Il cussegl da vischnaunca ha gest tractau il program d'investiziun. En quei senn duess quei document star a disposiziun per saver sclarir las damondas da credit. A vesta dallas investiziuns eis ei era pusseivel da preparar ina survesta da prioritads davart las investiziuns. Quellas damondas ston esser sclaridas entochen la seduta dils 26 da fevrer 2016.

Suprastanza communal

La gliesta cun las prioritads ei pusseivla da suttametter entochen la proxima seduta dil cussegl da vischnaunca. A caschun da quella seduta ei previu da suttametter al cussegl il project dalla meglieraziun funsila. Ei vegn ord vesta dil temps strusch ad esser pusseivel da tractar la medema sera la gliesta cun las prioritads. Perquei duei la gliesta cun las prioritads e la posiziun davart ils instituts bancars vegnir tractada ils 11 da mars 2016.

Il program d'investiziun preveda per la Val Acletta ina summa da frs. 800'000.-- repartiu sur 2 onns. Il program d'investiziun ha stuiu vegnir preparaus aschia, ch'il cussegl da vischnaunca ha saviu tractar quel ella seduta dils 20 da november 2015. Il studi datescha dils 22 da december 2015. Consequentamein eis ei buca stau pusseivel da risguardar quella summa en quella dimensiun el program d'investiziun.

A vesta dallas summas ch'igl investur preveda, resp. dil fatg ch'el ha gia investau 5 milliuns francs muossa che nus savein quintar cun ulteriuras investiziuns

supplementaras davart las pendicularas. Ei dependa denton era dallas pendicularas, schebein il pievel approbescha il project dalla Val Aletta. Las investiziuns che succedan

sin fundament dallas mesiras che la vischnaunca pren ston vegnir dabien al commerci ed al mistregn indigen.

Discussiun en detagl

Cussegl da vischnaunca

En connex cul project per la revitalisaziun digl Ual d'Aletta ha la suprastanza communal suttamess igl onn 2001 al cussegl da vischnaunca ina damonda da credit per duas variantas. Pertgei ei quei buca succediu cheu cun ina varianta che preveda ina revitalisaziun resp. ina varianta che va buca aschi lunsch? Gliez project ei vegnius realisau en 7 etappas. Cheu ei previu da realisar il project en in'etappa. Tut sto ira bia pli spert. Ei para che la vischnaunca vegni sut squetsch. Pertgei han ins buca previu ina sanaziun minimala sper in pusseivladad da revitalisaziun che pudess possibilitar contribuziuns dil stadi? En contas etappas duei il project vegnir realisau?

Suprastanza communal

Oz damonda la suprastanza communal il cussegl da vischnaunca in credit per realisar in project d'exposiziun. Igl onn 2001 ha la suprastanza communal suttamess ina damonda da credit per la realisaziun d'in project. La suprastanza communal sebasava leu sin in project concret a basa d'ina calculaziun da cuosts $\pm 10\%$. En quella fasa era l'etappaziun enconuschenta. Actualmein sebasein nus sin in studi da variantas cun in'exactadad da cusots $\pm 25\%$. Ulteriuramein ei la lescha davart la protecziun dallas auas vegnida revedida igl onn 2011. Las cundiziuns per ina revitalisaziun ein vegnidas pli severas. Oz vegness in project da revitalisaziun sco quel digl onn 2001 buca risguardaus sco tal e contribuziuns da quei gener fussen probablamein buca pusseivlas. El rom dil project d'exposiziun eis ei pusseivel e necessari da menar culs uffecis pertuccai la discussiun davart damondas da contribuziun.

Cussegl da vischnaunca

Cun quella discussiun va ei buca per impedir l'investiziun preveda a Sontga Catrina. Denton ei la vischnaunca semussada differentamein beinvulenta enviers las pendicularas. Cun enzonar il Crest d'Aletta e la midada da zonas a Sontga Catrina han votantas e votants scaffiu la pusseivladad da realisar grondas surbaghegiadas e cheutras saver recaltgar mieds finansials per las investiziuns pervidas. En quei senn ha la vischnaunca gia purschiu maun leutier. El rapport da planisaziun menziunescha la planisadra mesiras necessarias per in schurmetg d'object en cass d'ina realisaziun d'ina surbaghegiada a Sontga Catrina.

Buca en mintga cass ei la vischnaunca segidada cura ch'ei mava per realisar objects en zona blava. Co sepresenta la situaziun el cass d'auters flums ed uals el cass che la situaziun da prighel pretenda investiziuns?

El rom dalla projectaziun eis ei perquei da sclarir duas variantas. Ina tala che risguarda in schurmetg minimal cun in schurmetg d'object ed ina tala che possibilitescha da sligiar la zona da prighel. Quellas damondas ein da sclarir entochen ch'il project vegn suttamess alla votaziun. Tgei program ei insuma previus per la realisaziun da quei project?

Suprastanza communal

Per saver sligiar la zona da prighel basegna ei il rempar ella Val d'Aletta. La varianta cun in schurmetg d'object mida buca la situaziun actuala dalla zona da prighel. El rom dil project eis ei buca exlaus ch'ins anfla eventualmein ina sligiazion pli favoreivla. Per saver sclarir quellas damondas eis ei denton necessari da saver entscheiver cun la projectaziun.

Il program sespleiga sco suonda:

1. Il studi da variantas ei avon maun. La damonda da credit pil project d'exposiziun sebasa sil studi da variantas.
2. Aschinavon ch'il cussegl da vischnaunca conceda il credit da projectaziun, vegn entschiet immediatamein cul project d'exposiziun.
3. Silsuenter vegn il project suttamess alla votaziun dil pievel che decida davart il credit.
4. Aschinavon ch'il pievel conceda il credit per la realisaziun, vegn entschiet cun la realisaziun dil project. La realisaziun dil project resta denton colligiada cun la realisaziun dil Resort Catrina. La vischnaunca vegn ad entscheiver cun las lavurs da construcziun cura ch'ei vegn entschiet cun la surbaghegiada dil resort.

Vischinas e vischins e la vischnaunca spetgan persuenter che las interpresas indigenas vegnan risguardadas commensuradamein.

Cussegl da vischnaunca

En quei cass duess ins dar l'incarica da projectar dus projects. Cul proprietari dallas pendicularas ha la vischnaunca giu cletg d'obtener ina persuna ch'ei promta d'investar grondas summas enteifer la vischnaunca. Quei munta in pegliasis che pretenda da vegnir sustenius. Eis ei pusseivel ch'ins savess finanziar quell'investiziun cun contribuziuns da perimeter? Cheu setracta ei d'in sustegn per in'interpresa. Co vegn la vischnaunca a reagir sch'ina outra interpresa damonda per sustegn?

Suprastonza communal

Sco gia menziunau setracta ei tier las summas indicadas sin pagina 8 dil messadi da cefras indicativas che dattan ina survesta dallas investiziuns ch'eiin previdas en connex cun las pendicularas. Davart investiziuns e clavs da repartiziun eis ei necessari da contrahar. Pertuccont auters susteniments vegness ei ad esser necessari da giudicar il cass singul. En mintga cass setracta ei tier incaricas davart construcziun da schurmetg d'incaricas publicas. Perquei ei la suprastonza communal era s'engaschada el cass da segirar la Val Acletta. Per preparar duas variantas cun in studi da project tonscha il credit dumandaus buca. El rom dil credit po ei esser pusseivel da far ina cumparegliaziun culs indicaturs ch'in biro specialisau ha elavurau en connex cul schurmetg d'object pil Resort Catrina.

Era outras vischnauncas s'engaschan finanzialmeyn cura ch'ei va da sustener la realisaziun da tals objects. En connex cun la realisaziun dil resort a Breil ha la vischnaunca investau en objects d'infrastructura la summa da frs. 4'700'000.--.

Cussegl da vischnaunca

La damonda da credit per la projectaziun vegn buca messa en damonda. Eis ei pusseivel che las pendicularas vegnan integradas ella finanziaziun da quell'investiziun? Eventualmeyn fuss ei indicau d'involver las pendicularas a temps en la finanziaziun. Probabel capessen ils vischins meglier quella fatschenta, sche las pendicularas fussen involvidas. Tgei capeta cun ils ulteriurs projects sin ruccha? Tgei capeta cul pei da taglia en cass che quell'investiziun vegness realisada?

Suprastonza communal

En connex cul vitg da vacanzas Reka ei il maun public s'engaschaus cun 1.75 milliuns francs che ha la finala evocau investiziuns da ca. 16 milliuns francs. Tier il Hotel Acla da Fontauna ha la vischnaunca giu mess en vesta inagada in susteniment dad 1 milliun francs. La vischnaunca da Savognin investescha en connex cun la realisaziun dil resort da vacanzas la summa da rodund 4 milliuns francs. Ella gronda part dallas destinaziuns

d'unviern ei il maun public separticipaus cun grondas summas vid ils implonts da far neiv sco contribuziun all'infrastructura.

Ils aspects che seresultan ord la discussiun ston vegnir risguardai el discuors cun las pendicularas. La suprastanza communal ei partida dil fatg, ch'ei seigi caussa dalla vischnaunca da s'engaschar pli ferm sil sector dalla segirtad che vid autras investiziuns. Eventualmein ein quellas ponderaziuns da reveder. En mintgacass basegna ei ulteriurs discuors. L'investiziun da 90 milliuns francs giustificchescha en mintga cass in engaschi

supplementar davart dalla vischnaunca. Denton spera la suprastanza communal ch'era l'economia locala vegni fructificada grazia a quellas investiziuns.

Cussegliaer Adrian Deflorin

Con lunsch ei la damaonda davart ina participaziun finanziaria vegnida discussiunada cun las pendicularas? Ils impuls ord la discussiun ein da risguardar els discuors cun las pendicularas. El suttametta suandonta proposta:

Perquei che la construcziun dil rempar levgescha il baghegiar dil Resort Catrina ed excluda la staziun da val dallas pendicularas ord la zona da prighel blava e possibilitescha leutier la construcziun da parcadis novs, duei la suprastanza communal contrahar cul possessur dallas immobilias numnadas sur d'ina participaziun adeguata vid ils cuosts dil rempar.

Giavischabel fuss ina summa ella grondezia dil respargn da cuosts vid las mesiras dil schurmetg d'object (mesiras passivas) pil Resort Catrina sco era la staziun da val dallas pendicularas.

Votaziun

Cun 4 encunter 6 vuschs e 2 abstenziuns decida il cussegl da vischnaunca da buca corrispunder alla proposta da cussegliaer Adrian Deflorin.

Cussegl da vischnaunca

Ei duei vegnir sclariu, schebein ils mieds finansials ein avon maun. Il rempar ei necessaris per che las ulteriuras investiziuns san vegnir fatgas. Ei fuss in schliet signal sch'il cussegl da vischnaunca schess na al credit da projectaziun. Eis ei denton la dretga strategia d'enserrar en quei project las ulteriuras investiziuns? Quei project duei vegnir presentaus senza far allusiun dallas ulteriuras investiziuns. Cunzun il project per indrezs da far neiv ei dispoteivels. Ei fuss pli prudent d'investar en autras purschidas ch'en tals indrezs.

President dil cussegl da vischnaunca

Ei fuss prudent sch'il proprietari dallas pendicularas presentass cun caschun pil detagliadamein al cussegl da vischnaunca ses projects.

Suprastanza communal

Igl ei buca caussa dalla vischnaunca da metter en damonda ils products ch'in investur vul realisar. Quella damonda sto igl investur che porta era la resca giudicar. La sesiun d'unviern ei aunc adina la sesiun principala. Enteifer 3 meins genereschon las pendicularas 60 entochen 70% da lur recav. Il rest sereparta sin ils ulteriurs nov meins. Investiziuns en novas purschidas ein necessarias, denton buca senza desister dil menaschi d'unviern. Tragicamein sto ina destinaziun disponer da stabiliments da far neiv. Senza quella garanzia mauncan las reservaziuns necessarias.

Cussegl da vischnaunca

Il dargun che percuora la Val Acletta munta buca mo in prighel pil resort e per ulteriurs baghetgs a Sontga Catrina. Il dargun percuora la val entochen el Rein. Ins astga spitgar che las mesiras da segirtad che vegnen projectadas a Sontga Catrina ed ella Val d'Acletta vegnan era dabien a quei tschancun sut la punt dil stradun dall'Alpsu a Funs entochen a Raveras e ch'era quels habitadis sappien profitar dallas investiziuns previdas. En quei senn duess ins buca mo sefixar sil resort.

Tgei capeta en cass che las mesiras da segirtad vegnan buca realisadas? Ei ina lubientscha da baghegiar pil resort dependenta dil project pil rempar?

Suprastonza communal

Igl ei ina damonda dalla segirtad, co il project pil resort vegn realisau ni buca. La discussiun e l'informaziun davart las investiziuns previdas sto succeder ussa senza vuler far tactica da salami. Aschinavon che la damonda da baghegiar pil resort ensiara ina sligiaziun cul rempar ed il project pil rempar vegness snegaus, stuess l'istanza da baghegiar snegar la damonda da baghegiar pil resort, perquei che la segirtad savess buca vegnir garantida en quella fuorma. Il project pil resort stuess en quei cass vegnir surluvraus. A vesta d'ina investiziun da 90 milliuns francs vegn la vischnaunca en mintgacass a stuer s'engaschar sin ina maniera u l'otra.

Cussegl da vischnaunca

Nus lein ei, savein nus era pagar ei? Vegni contrahau che la lavur resti era ella regiun per sesez per prezis da concorrenza sco quei ei stau il cass tier la Reka ni era el senn dallas cundiziuns ch'ei vegnidus fatgas al Crest d'Acletta?

Suprastonza communal

Dapi onns deplorascha il cussegl da vischnaunca ch'ei maunchi investurs privats che seigien promts d'investar a Mustér. Ussa essan nus ella favoreivla situaziun ch'in investur ei promts d'investar, in tal ch'ei ual era promts da semussar e che ha gia fatg investiziuns a Caischavedra ed el Hotel Catrina. La vischnaunca ha mai schau per breigia da segidar el cass d'investiziuns considerablas. Impurtont ei che la vischnaunca sappi era investar leu nua che las investiziuns genereschon plazzas da lavur e promovon l'economia communal.

Era sch'il cussegl ha renviu la proposta da cusseglier Adrian Deflorin ei la suprastonza communal dall'opiniun ch'ei seigi necessari d'anflar ensemen cugl investur sligiaziuns che tegnan quen alla discussiun occurrida questa sera.

Decisiun

Cun 12 encunter 0 vuschs e 0 abstenziuns decida il cussegl da vischnaunca:

- 1. da prender **enconuschientscha** dils projects dallas Pendicularas Mustér, sco era dallas investiziuns resp. finanziaziuns che la vischnaunca vegn **confruntada** proximamein en connex cun quellas investiziuns;*
- 2. da conceder in credit da planisaziun net da frs. 160'000.-- per preparar il project da publicaziun per in rempar en Val Acletta.*

Cussegl da vischnaunca Disentis/Mustér

Il president:

Igl actuar:

Livio Zanetti

Ervin Maissen



Cussegl da vischnaunca 28-2013/2016

Seduta dils 29 da schaner 2016

3. Ura da damondas (conform ad art. 44 dil regulativ da fatschentas)

Suprastonza communal

Cussegliaer Flavio Murer ha inoltrau ina damonda a scret. A vesta da sia assenza questa sera vegn quella damonda rispundida a caschun dalla proxima seduta.

En connex cun in correspondenza ch'ei succedida il december 2015 declara la suprastonza communal sco suonda:

„Cun l'email dils 3 da december 2015 cun il tetel decisiun dertgira federala repartida da cusseglier Flavio Murer agl entir cussegl da vischnaunca inculpescha el la suprastonza communal da grevs falliments. L'executiva communal ei surstada, trumpada e vilada da quella propaganda zuppada repartida en connex cun la decisiun dil Tribunal federal dalla surbaghegiada a Caschuarz. Denter auter san ins leger en quei sriver „Ponderaziuns davart in abus d'uffeci ein en quei cass special buca diltuttatfatg fallidas“.

Igl artechel 312 dil dretg d'obligaziun definescha igl abus d'uffeci sco suonda:

„Missbrauch der Amtsgewalt von Mitgliedern einer Behörde oder Beamten, um sich oder einem andern einen unrechtmässigen Vorteil zu verschaffen oder einem andern einen Nachteil zuzufügen“.

La suprastonza communal renviescha detschartamein aschi bein dad haver favorisau enzatgi en ina fuorma ni l'autra sco era dad haver disfavorisau enzatgi. Sche quei exempel fa scola, ei ina collaboraziun vicendeivla denter ils differents gremis politics buca pusseivla. Nus supplichein il cussegl da vischnaunca instantamein da reponderar sia correspondenza avon ch'accusar in'instanza nungustificadamein e da setener vid las usanzas da respect e convivenza.“

Cussegl da vischnaunca

La tabla d'informaziun sper Halla Cons ei buca pli actuala e stuess vegnir renovada evtl. remplazzada e cumpletada.

President dil cussegl da vischnaunca

La proxima seduta dil cussegl da vischnaunca ha liug venderdis, ils 26 da fevrer 2016 allas 20¹⁵ en casa communal.

Pendenzas

Fatschenta/Sparta	Termin	Responsabel	Remarcas
Priorisaziun dallas investiziuns, gliesta	Ils 11 da mars 2016	Suprastronza communal	
Informaziun dalla populaziun davart la politica da tgira	Ils 24 d'avrel 2015	Geraua Cecilia Maissen	
Survesta davart ils cuosts en connex culs donns d'uaul. Risposta el decuors dil meins d'avrel 2016	Ils 21 d'uost 2015 Ils 9 d'october 2015 Ils 20 da november 2015 Fin mars 2016	President communal Geraua Cecilia Maissen	
Remplazzar ni renovar la tabla d'informaziun sper Halla Cons			

Cussegl da vischnaunca Disentis/Mustér
Il president: Igl actuar:

Livio Zanetti

Ervin Maissen

Disentis/Mustér, ils 31 da schaner 2016

C:\Users\maissen\Documents\Vischnaunca\Cussegl da vischnaunca\cussegl da vischnaunca 2013-2016\Protocols\Cus0016_28.docx